

懷寧縣志卷三十二

釋道

高僧異人古多出於吳楚之間蘄黃潛霍廬阜九華江南北磊然相望懷故與之毗接遠近數百里蓋其風流所漸有自來矣今世習 氏法高者妙達宗旨次亦刻意冥行及其旁流乃不免奇變恢詭存之別自爲教要非資材之美者則亦不能有聞於時也

宋義青禪師懷寧李氏子七歲出家習百法論長入洛聽華嚴義若貫珠至浮山三年遠錄公時出洞下宗旨示之悉皆妙契乃付以太陽頂相履襪囑曰代吾續其宗風無久滯此令參圓

通秀禪師至彼無所參問惟嗜睡而已秀曳杖入堂見師正睡乃擊牀呵曰我這裏無閒飯與上座吃了打眠師曰和尚教作何務秀曰何不參禪去師曰美食不中飽人吃秀曰怎奈大有人不肯師曰待肯堪作甚麼秀曰上座曾見何人來師曰浮山秀曰怪得恁麼頑賴遂握手相笑歸方丈由是道聲藉甚初住白雲後遷投子臨寂書偈曰兩處住持無可助道珍重諸人不須尋討閣維得舍利五色同靈骨塔於寺北三峰庵

白雲守端禪師衡陽葛氏子幼事翰墨依茶陵郁披剃往參楊岐言下大悟尋遊於懷寧結茅盛唐山之西守令慕道請師主潛山太平寺及宿松法華寺法席嘗作蠅子透窗偈云爲愛尋

光紙上鑽不能透處幾多年忽然撞著來時路始覺從前被眼
瞞

明無心和尚者蜀人也萬歷間自西而東朝普陀巖住潛嶽之
永水菴年七十好笑如兒童狀居有頃逢人募薪一束積至百
擔自理之如陶穴然一日寄語辭山下人曰無心以某日去人
怪之及期師入柴穴中居民畢集頂禮無心木魚聲不絕然後
取火手自茶毘火光撲面將木魚向外擲下口稱去了須臾而
化其骨不僵至今塔在小岑肖像如生焉

回翔庵灰心禪師初往參壽昌慧經禪師值經已逝聞經從大
好山悟道遂晝夜力參二十餘年脇不至席一日忽大笑曰推

倒大好山也住迴翔庵僧問如何是回翔境師曰巖前花雨高
低落屋後松濤日夜流問如何是境中人曰對面不相識問師
唱誰曲宗風嗣阿誰曰彭蠡湖邊風起浪大龍山上火燒天與
劉公景孟最善公屢請應世不從示寂偈曰放倒從前鐵脊梁
今朝撒手便還鄉去來畢竟誰回互倒跨泥牛過溟滄葬於庵
後其冢不壘自高

楊和尚明季人精通內典結茅習靜於小雉嶺得異術禱雨必
應某年夏大旱鄉人卽其山立壇和尚限三日不雨卽焚身屈
三日不驗遂自焚而雨大注鄉人異之因名其山爲和尚山肖
像於圓通菴內後天欲雨焚身處輒起雲霧故至今雩禱必請

像至壇祀焉

繡頭和尚住龍山巔之鄧家庵年九十餘不食煙火趺坐一石髮卷如繡圓寂時頂上光成五色

無染禪師有塔在集賢門外準提庵塔銘桐城陳焯所作其文曰師諱性慧字無染姓黃氏其先世以軍功襲指揮於安慶故爲安慶衛人師生而雄特長顴竦肩膂力過人年四十餘慨然有枕戈自樹之志明崇禎末忠惠史公專閩皖上師籍小校軍前鬱鬱不樂聞普周老人來從雞足道行殊衆爲緇素所推相從談出世事豁然有省遂受具足戒薙染爲僧時江北兵寇交訌又饑饉乏食師任樵採析薪易米以炊閒侍普周杜門禪頌

團瓢相倚眞無著天親如也無何秦楚劇寇奔會潛桐皖爲左帥亂兵所屠川谷流血彌望千里師露處荆棘中泫然流涕曰此劫灰也何意當吾世遇之豈大事因緣固卽在是乎夫掩骼之政勢難及於鋒鏑之場吾仗法乳以澤枯骸則諸纍纍者皆福德種也吾敢惜吾力乎於是以畚鍤爲鉗錘以繩芒爲杯渡以蒿里薤露爲提唱朝覓一餐暮周四境鑿坎誌之委骨封之蓋皖郊百里無復道殣如此者數年干戈始定而師亦已老矣作勞日久兩聰俱墮然猶三募石橋臥波之虹工緻堅好行道賴之自爾一意施茶濟渴矻矻無少怠憶順治丁酉余憩皖之北關師時構茶棚一區耳未幾過之則像設莊嚴精藍層布再

過之則前竿照夜後殿矗雲雖其勤可集功材能蔽事要亦道風動衆不介而孚非偶然矣康熙己酉七月自定死期謂西歸當在孟冬初十日也屆期提板置大甕中跏坐而瞑移時復瞠目詢弟子曰坐尙淺乎抑板稍下形神離矣嗚呼今之豎法幢者機鋒箭激撰述枝分洞濟源流各承血嗣及觀其駘沈作苦淹滯彌留曾無少異於庸衆而師之所得若此豈教外別傳固在樸心實行而非瞬目揚眉者所得與耶師生明萬歷丙申八月之二十六日卒清康熙己酉十二月初十日僧臘三十三世壽七十有四其高足古元將以壬子冬十月初六日礮石塔瘞師於黃土山之陽而以塔銘屬予予習師久誼不能辭也銘曰

蕩陰之墟厥嵒縱橫於誰收之象教是憑天意生師爲濟陽九長鑿短錘不離其手有萬者坎積之京垓門開甘露水際山隈梵行有常三千八百永此一心具完何闕大慈攸暨餘不足言浮塵六夢嗒焉以捐窳堵維堅藏正法眼樂哉斯邱是謂無染康熙十二年歲次癸丑仲春月吉日立

清釋性源號止水生而穎慧少卽通儒書爲文字禪詩律清嚴可誦好參學晚得靜土於大龍之巔誅茅結刹終日趺坐一日烈風震電雨傾如注庵後數蛟騰起水深三尺沙彌皆驚悸欲絕源入定自如蛟從屋角委折而下若不敢犯者人咸異之年七十自定逝期沐浴禮佛而終

元白禪師武岡州人姓鄧氏生時火光滿室幼慈慧勸人勿殺
闔室持齋及長謁顓愚大師於五臺庵遂乞剃度顓爲取名音
可字佛心師辭顓至南嶽謁湛大師湛詢是顓首坐曰顓得人
矣復往參憨山博山天童諸老宿皆深器之尤於天童棒下有
省天童臨終時記別十六人獨師以他適未與然天童心授爲
嫡嗣者師也師初往寶峯泐潭考釋馬祖下歷代說法機緣名
泐潭世錄順治丁亥春至桐城入慧山清泉寺寺經兵燹僅僧
寮數椽師芒鞋敝衲拮据九載煥然成叢林法席大振後退居
舒之華蓋山述圓通廣懺懺成出山募梓僧衆請主潛山天柱
寺舟經皖撫軍張朝珍延錫清涼庵爲捐貲刊懺復啟廣懺道
場百日事畢師示微疾端坐而逝時年七十五僧臘五十三遺
命塔於天柱寺之右張撫軍復捐金造塔壬子八月塔成世稱
爲元尊宿云師圓照諦先權實互用於臨濟一宗直得其髓卽
世諦文字搖筆千言不假思索所謂徹通三教具無碍之智慧
者詩文語錄凡數百卷藏於桐城魯叟之幸庵
太平寺明誠和尚苦行修持搬運薪水人莫能識康熙三十年
臘八日焚身寺後之高岡先是於其地募薪營巢屆期說偈云
來是明誠去是誠明今日懸崖撒手全憑這點光明遂入內執
炷香旋燒火隨迅發傾國往觀見端坐烈欲中持觀音呪不絕
皖人卽其處建塔表焉

月田和尚法名覺海父爲池州守戎生而茹素長爲僧性介直
眞樸苦行清修不募檀越不爲住持不收徒衆翛然物外如孤
雲野鶴遇有佳山水及靜處卽留憩不久亦他去士夫貴顯罕
見其面或聞其高願結茅居之曰四大皆空何以居爲固請則
笑而不答有飯之者只一盂否則不食過午亦不食後涅槃於
鐵佛庵

西竺庵祥壽禪師字有光詹氏子八歲出家年十八徧參吳越
諸老宿性體高妙不受佛法牢籠工書善詩出語閑雅郡縣多
敬禮之壽六十有六而化臨化預定逝期自作偈云說法曾依
雙樹看書未滿三車身披一領舊袈裟雲散風流去罷嘆一色
杏花紅十里老僧歸去馬如飛時乾隆丁未二月十八日趺坐
而逝塔瘞於太平寺右有碑銘

甌山僧果成少時爲人灌園日得傭資以養父母卒果成已六
十餘矣哀慕如孺子遂爲僧於墓旁置一草棚日供佛夜栖草
棚寒暑無間者十餘年冬不衾夏不帳一衲一蒲團而已

西竺庵僧道增自其師以上三代皆爲安葬父母嘗托鉢京師
諸優伶輸香火資者不終日累千金悉却不受曰吾不能與若

輩溷也

以上道光志
江爾維分纂

華陽姓柳洪都人幼好佛因入梵宇有悟遂尋師侶足跡遍荆
楚間無所得乾隆間抵皖投雙蓮寺落髮久之遇異人伍冲虛

傳授心法嗣至匡廬又遇壺雲山人開悟微密著有慧命經傳

於世

胡遠濟
續纂

明萬一無江西羽士也丹成出遊名嶽至安慶偶憩佑聖觀見殿角頽圯重新之至桐邑又鼎建碧霞宮成而一無卒卒既三日有見其乘驢入龍眠山者佑聖惟遺鐵鼎後有黃冠者攜去莫知所之

顏聰號皖江懷寧人幼孤貧目不知書鬻茶爲業往來於皖公諸山有李生者時與同遊或數月一歸或經年忘返獨居一室足不踰闕者五十年忽大悟夜半聞兒讀書曰此吾所宿記也自典籍及三乘百家之理叩之靡不貫通尤精於易一日忽治

懷寧縣志

卷三十一 釋道

七

裝若遠行狀曰李生且至策杖迎之而生果至謂其子曰吾將遊荆襄吳越間相與徒步而往三年後歸與生拱手曰後會不遙轉盼失生所在越數年忽召其子咸集曰某月日時吾當遠去至期而飲食起居無異也次日雞鳴起沐浴衣冠焚香端坐戒子曰吾愛豹嶺山水將卜葬於此四載後年月日時會四辛當奉予寔言卒而逝年九十七

崔道人不知何許人萬歷初至龍山眞乙觀自言得修煉秘訣年已百有三歲神情卓朗膚色鮮瑩寒暑惟一衲襖郡守葉就龍山咨論三日歎曰何處更訪安期

劉尚羔字質明少奇穎絕倫年三十破產遠遊訪異人讀異書

至江西龍虎山晤正乙張真人云此山有洞吾祖封識數百年
待劉姓者來尙羔啟戶入見石案符篆果有已姓名在上懷歸
而讀之遂豁悟元要築宮名碧虛危樓三級常凝目靜坐於上
或手著道書值連旱里人祈禱之羔每登臺符呪畢大雨如注
又能擊妖斬魔忽一日自言欲蛻去沐浴端坐作詩數首有曰
劍挂元壇魔鬼服書藏石洞列眞傳寄語時師高著目人間難

住大羅仙書畢坐逝

以上道光志
江爾維分纂